



Ol Spika Bung

Poto i soim Mista Kingsford Dibela (namel) spika bilong palamen bilong PNG i toktok wantaim spika bilong palamen bilong Australia, em Sir Billy Snedden. Man i sambai em i Mista Tony Elly, em i klak o kuskus bilong palamen bilong PNG.

Tupela i mekim lukluk raun long wok palamen long Australia na hia ol i sanap ausait long haus palamen long Canberra. Palamen bilong Australia i bin singautim tupela i kam.

Poto i kam long Australian Information Service na Malcolm Lindsay i bin kisim.

LUKIM INSAIT

Poto Stori	2
Plisman Win Nau	3
Meri No Gat Wok	3
Pas i kam	4, 16
Ol meri	5
Sir Tore	6
Tambuim Muvi	6
Sunam Kona	7
Narakain Et Pos	9
Thomas Kavali	9
Ausait Bisnisman	10
Wabag Ples Balus	12
Vokesenel Senta Ripot	13
Stori Tumbuna	15
Baibel Piksa Stori	18



Poto long lephan i soim Mista Julius Chan, namba tu praim minista na minista bilong praimer i indastri i sindaun toktok wantaim Mista Andrew Peacock, minista bilong ol foren afeas bilong Australia.

Mista Chan i bin stap long Mas 29 inap Epril 10 na i lukluk raun long planti hap bilong Australia na i toktok wantaim planti minista. Long ai bilong em yet, em i lukim wok bilong wokim tin pis, suga faktori, na pasin bilong groim olkain kumu na sayor bilong salim long maket.

Poto i kam long Australian Information Service. Ian Mitchell i kisim.

Poto daunbilo i soim Nevi ofisa Leptenan Eddy Konos bilong Madang i skul long Sydney long pasin bilong salim tok wantaim lait, pasin bilong glasim narapela sip.

Em wantaim 6-pela arapela ofisa bilong PNG i tren inap 5 mun long nevi long Australia. I gat sampela ofisa bilong arapela kantri tu i stap insait long kos.

Poto i kam long Australian Information Service, Bill Payne i kisim.



wantok
Melanesian Weekly in Pidgin

National weekly in Melanesian Pidgin.

Editorial Offices:
 P.O. Box 1982
 Boroko

Phone: 25.2214
 25.2552
Telex: NE 22213

Branch Offices:
Wewak
 Phone: 86.2479

Wabag
 P.O. Box 111

Advertising:
In P.N.G.
 Ms. Penny Donald
 Phone: 25.2214

In Australia:
 Kevin Engel
 8 Duraba Pl.
 Caringbah (2229)
 Phone: 525.6263

Subscription Rate:
 Annual: K8.00



MERI I NO GAT WOK

Hia em i wanpela stori i kamap long wanpela Helt Senta long El Salvador, Sentral Amerika. Wanpela dokta, Rosa Cisneros, em i bungim wanpela papa long Helt Senta. Tupela i stori olsem:

Dokta: Yu gat hamas pikinini?

Papa: Meri bilong mi i karim 16 pikinini. Tasol, sori, 7-pela i dai pinis.

Dokta: Meri bilong yu i wok tu?

Papa: Nogat. Em i stap long ples tasol.

Dokta: Long olgeta de, meri bilong yu i save mekim wanem samting tru?

Papa: Mi tingting gut pastaim na bai mi stori. Long moningtaim tru meri i save kirap na go painim paiawut na karim wara i kam. Em i kam bek pinis, em i save kukim kaikai bilong mi wantaim ol pikinini bilong mi. Mipela kaikai pinis, meri i kirap na i go long wara. Em i wasim ol klos bilong mipela. Wasim pinis, em i go long maket long baim kaikai. Maket pinis em i kam bek long ples na redim kaikai bilong mi.

Dokta: Yu save kam bek long ples long belo?

Papa: Nogat. Mi stap long wok. Meri i mas bringim kaikai i kam long mi. I no longwe tu-mas, klostu liklik.

Dokta: Yu kaikai pinis, nating meri i go bek na i slip liklik, laka?

Papa: Olaman, em i no ken slip. Em i mas givim kaikai long ol pik na kakaruk bilong mi. Na tu em i mas was gut long ol liklik pikinini.

Dokta: Nating ol dispela wok i pinis, nau meri i ken malalo liklik?

Papa: I ken. Tasol em i mas stat long redim kaikai bilong mi. Nogut mi kam bek long wok na kaikai i no tan.

Dokta: Kaikai pinis, nating nau em taim bilong meri long kisim win liklik?

Papa: Nogat. Mi bai go slip. Tasol meri i mas stretim gut haus na ples slip bilong ol pikinini. Bihain ol pikinini i slip pinis, meri i ken go slip.

Dokta: Olsem wanem na yu tok meri i no gat wok?

Papa: I tru, meri i no gat wok. Em i stap long ples tasol.

Ol Papua Niugini i ting wankain tu, o nogat?

Plisman win

Las taim Palamen i bin sindaun mekim wok bilong em, ol memba i bin tok orait long 4-pela nupela bil o lo bilong helpim ol plisman i daunim tru ol hambak na pasin nogut bilong ol raskol na stilman insait long ol taun.

Na insait long sampela wik nau, namba bilong ol rong i bin go daun tru insait long ol sampela taun. Olsem i luk gut; na i lukim olsem dispela ol lo i karim kaikai nau.

Mista Michael Somare, olsem Minista bilong Plis, i bin tok em i laik givim moa pawa long ol plisman. Inap nau planti lo tumas i pasim han na lek bilong plisman, na i helpim ol stilman na man nogut. Nau em i ting nupela lo i ken stretim dispela ol samting.

Search (Amendment) Bill - Dispela lo i givim pawa long ol plisman long go insait long wanpela haus o ples na painim ol stilman o man nogut. Na ol i no mas kisim tok orait bilong wanpela kot bipotaim. Bipo planti taim ol man nogut i ranawe bipo plisman i kisim pinis dispela pepa i tok orait long ol i ken go insait long ples o haus. Nau, i no gat moa.

Arrest (Amendment) Bill - Dispela lo nau i tok sapos plisman i pasim na sasim wanpela man, na bihain ol i bin painim plisman i bin mekim asua long dispela kot i no ken putim hevi long em long baim kot. Ol i mas lukim na glasim gut, plisman i bin mekim wanem, na watpo em i bin mekim. Nau plisman i no ken pret olsem bipo long sasim wanpela man.

Bail (Amendment) Bill - Long dispela lo, jas o mejistret long kot i ken pasim wetkot long rum na no larim em i peim sampela mani bilong go ausait. Sapos jas i ting dispela man bai ranawe na i no kam bek long kot, orait, em i ken pasim em olgeta inap long taim bilong kot. Dis-

pela bil o lo i gat pawa tu, sapos ol plisman yet i ting i nogut wanpela man ol i pasim pinis i ken baim taim bilong wetkot na go fri. Na tu wanpela man i brukim lo i no ken ran long painim wanpela jas o mejistret i ken senisim lo na larim em i go, sapos em i putim mani.

Summary Offences (Amendment) Bill - Dispela lo i putim bikpela pe na longpela taim moa long kalabus Tong ol man i spak na i pait long dispela taim bilong spak. Em i putim spesel hevi long ol i yusim gan o tromoim ston, o skrapim bel bilong ol pipel long statim pait. Bilong dispela ol samting, ol inap baim kot long K100 o stap inap 3-mun long kalabus.



Wanpela narapela lo Mista Somare i laik statim em i bilong tambuim olgeta manmeri long wokabaut long taun bihain long sampela aua long nait. Maski yu wanem kain skin, o yu husat. Sapos yu go long muvi o long pati samting, yu mas holim wanpela tiket tok orait long kam bek long haus bilong yu long nait.

Kain lo olsem bai mekim hat tru na putim bikpela hevi moa long ol raskol i save raun long nait. Plis i lukim ol tasol na inap long ol i ken kalabus.

Na tu ol i ken mekim lo olsem long ol ka i no ken ran nating long biknait. Em i samting bilong lo. Dispela lo i min, olgeta pipel i mas stap insait long haus bilong ol long dispela taim. Sapos yu stap ausait, yu wokabaut, yu draiv, yu raun - yu brukim lo.

Na wanpela samting moa ol plisman long Port Moresby na long ol arapela taun i bin statim. Em pasin bilong stapim olgeta ka i go pas long wanpela hap, inspektim ol ka, lukim sapos draiva i gat laisens, na em i no spak. Sapos em i spak, em i lus.

Olsem tasol na ol ka i ran mobeta nau long ol taun na i no gat planti birua i bin kamap. Namba wan birua bilong draiv em i strongpela dring.

Bipo i gat sampela tok i kamap long givim gan long ol plisman long sampela taim. I no gat tok moa long dispela samting. Tasol i no gat lo i tambuim ol plisman long karim gan olsem bikmaus long sutim ol man nogut long lek bilong ol - tasol i no inap long kilim ol i dai.



LAIKIM PENPREN

Dia Edita - Mipela ol dispela lain meri i laikim ol penpren long olgeta hap bilong Papua Niugini. Em hia nem na adres bilong mipela.

Mis Edwik Tuia (17),
Mis Monica Magea (15),
Mis Maria Kaona (15),
Mis Theresa Timo (17),
Mis Margaret Teko (16),
Mis Felestias Baki (16),
Mis Margaret Pake (14),
Mis Jullie Andrisa (15),
Mis Celina Mari (16),

Sapos sampela penpren i laik rait, orait, rait i kam long dispela adres.

School of Nursing,
Kimbe General Hospital,
P.O. Box 99,
Kimbe. W.N.B.P.

HAGEN HEVI

Dia Edita - Nau mi laik autim wanpela wari bilong mi i go long Wantok Niuspepa na ol manmeri na pikinini bilong Maun Hagen taun bai harim gut na putim long het bilong ol.

Mi bin lukim insait long Maun Hagen taun i no gutpela tumas, i rabis tru. Long wanem olgeta taim ol waitman na meri o ol turis bilong narapela i save kam lukluk raun long Maun Hagen taun. Na ol raskel man o stilman bilong Hagen, taim ol i lukim ol i wokabout bilong ol yet long rot. Tarangu ol stilman i bihainim ol olsem pik o dok na kisim mani bilong ol o wanem samting bilong ol.

Ating yupela ol wan wan hetman bilong Hagen i no save sori long ol waitman na meri taim yupela i save stilim mani o ol samting bilong ol. Yupela i mas sori long ol bilong ol i no kam kisim o stilim rabis kaikai olsem kaukau, suga, na ol samting olsem bilong yupela. Ol i kam long lukluk, raun long taun long Hagen. Na i go bek long ples bilong ol.

Yupela i mekim pasin nogut tru long ol waitman na meri i kam long PNG na tu ol i lukim pasin bilong Hagen i no gutpela, bai ol i go na toktok olsem mipela i go raun long Hagen taun i no gut. Planti stilman i stap. Ating olgeta hap bilong PNG i no gat tasol Hagen tasol i save bagarapim nem bilong PNG.

Nick S. Avene,
Mt. Hagen.

KROSIM KEPTEN

Dia Edita - Yes, wari bilong mi i go olsem: Planti taim mi save harim long ol planti man na mi yet tu lukim long ai tu, dispela pasin kepten bilong M.V. Totol i save mekim. Em i save kisim planti pasindia bilong i go long Lae. O long Lae i kam olsem long Madang. Namel long dispela em i save lusim sampela pasindia i stap nabaut olsem long Biliau, Jara, Wasu, Sialum na Finsch.

Mi yet i lukim wanpela man bilong Bilau i laik i go long Finsch na em i kisim i go lusim long Wasu na em i lusim em na i go long Finsch na Lae. Long dispela taim sampela samting bilong dispela man i lus. Dispela pasin mi lukim na i no stret tumas long mi. Olsem na mi laik mekim - pela askim.

- 1.) Dispela sip em i bilong wanpela kampani, o bilong husat?
- 2.) Wanem as bilong nem Totol?
- 3.) Sapos wanpela samting bilong ol pasindia i lus bai husat i bekim?

Mi laik harim bekim bilong dispela askim long Wantok Niuspepa.

Mi save yu save ron long taim, tasol yu mas lukaut gut long ol pasindia. Dispela ol lain pasindia i no save kalap long sip nating, man, ol i save lusim bikpela mani ya.

Tony T.
Finschhafen/Lae.

BOTOL KATIM TAIA

Dia Edita - Mi i gat wari long rot long Maun Hagen na Kagamuga Rot. Long wanem dispela rot em i gat kolda, na sampela man i save tromoi botol long namel long rot i nogat, long wanem planti ka i save brukim ol taia.

Mi wanpela taim mi bin draiva tipa trak na karim wesana go antap long Maun Hagen taun. Na dispela trak tupela tia long bihain i bruk long wanem planti botol i bruk namel long rot. Mi lukim na ol botol i brukim taia na i pans. Mi lukim olsem na mi rait long Wantok Nius.

Yupa Kunjip,
Mt. Hagen.

Salim ol pas
i kam long:

WANTOK
BOX 1982
BOROKO

SAPOTIM SOMARE AIDIA

Dia Edita - Mi sapotim tru tingting bilong Praim Minista, Mista Somare bilong Papua Niugini. Mista Somare laik bai ol nesenel lida nau lusim bisnis bilong ol.

Dispela tingting bilong Praim Minista em i gutpela tru bikos ol Nesenel na Provinsal lida i no save tingting tumas long ol pipel bilong ol, taim ol i mekim bisnis bilong ol tasol. Mi bilip sapos ol lida bilong mipela i lusim bisnis bilong ol bai kantri bilong yumi bai ran gut tru. Bikos taim lida i gat tupela samting politik na bisnis em i wok long tupela masta, na tupela samting i paulim em nogut tru. Na em i no moa tingting i kam long ol pipel husat i votim em.

Mi askim yupela ol Nesenel na Provinsal lida, ol

pipel makim yu long ranim gut dispela kantri bilong yumi Papua Niugini o ol makim yu long wokim bisnis bilong yu tasol?

Tarangu mi tokim yu sapos yu, no laik makim ol pipel bilong yu insait long Nesenel Gavman na Provinsal Gavman yu mas pinis kwiktaim tru long wok bilong yu nogut yu westim taim long Palamen.

Mi askim strong i go long Nesenel Palamen na Provinsal Palamen long givim pawa i go long Ombudsman Komisnin long was gut tru long ol lida bilong yumi. Sapos Ombudsman Komisnin i painim wanpela lida bilong nesenel na provinsal gavman abusim politik wantaim bisnis, Ombudsman Komisnin mas rausim em na askim pipel bilong dispela ilektoret long votim gen narapela memba bilong makim ol long palamen. Em tasol, tenkyu.

David Sisito,
Kieta/Not Solomons



BATEN MERI BATEN MAN

Dia Edita - Plis inap long larim hap liklik spes long mi putim toktok bilong mi? Mi laik bekim na toktok strong egensim pas bilong brata Rafael Kerom bilong Maun Hagen long Wantok Niuspepa long 25 Mas 1978 na pas bilong E. Gim long 25 Februari 1978.

Mi laik toktok strong egensim toktok bilong pas

bilang tupela man hia i no laik long ol meri bilong PNG long pasim klos bilong ol man. Mi ting ol man i no ken bosim ol meri long wanem klos em ol bai pasim skin bilong ol. Yes, mi laik tok olsem man yu no bosim olgeta meri.

Mi laik toktok olsem ol meri i putim trausis na siot i orait na i no gat asua samting. I no gat lo bilong PNG i tambu long dispela. Mi ting ol meri i putim trausis na wanem samting long skin em i laik bilong wan wan na em i wari bilong ol meri.

Mi sapotim ol meri long ol bai pasim trausis long wanem mi bin eksperiens long sampela birua kamap long ol meri long wanpela pait namel long tupela meri mi bin lukim narapela meri i strong na winim narapela. Dispela strongpela meri i brukim na rausim olgeta dres na laplap bilong narapela na em i no stret, long kain kain birua olsem dispela sapos meri i pasim trausis bai gutpela bilong wanem i no isi long brukim trausis na samting.

Long las toktok bilong mi em long ol man. Sapos yu lukim wanpela meri raun long taun long trausis orait yu go kamap klostu long meri na was gut long dispela samting. Bai yu lukim ol somap bilong pulaen bilong trausis na siot baten i stap long han kraus tasol long trausis bilong man na siot ol sipa na baten i stap long han sut tasol.

Mi ting ol meri i putim trausis i smat tru tasol ol sampela man i mangal na kros nogat as bilong en. Nogut yupela tingting paul, mi wanpela man i raitim dispela pas na mi laik harim wanem wari bilong yupela long pas bilong mi.

Sapos wanem man o meri i ting i no stret o kros long dispela orait, rait i go long Wantok Niuspepa long wari bilong yu na mi ken lukim. Em tasol ol toktok bilong mi.

Johnson Ioya Graiy,
Arawa/Not Solomons



NIUS BILONG OL MERI



GUTPELA KAUKAU

I tin mit, 1 bikpela liklik spun bata, (gris i orait tu), anian, 1 kap sup, muli, liklik spun blakpela sos, sol, pepa, kaukau.

PASIN: Katim mit liklik. Hotim bata long sospen, katim anian, kukim. Nau putim blut muli wantaim sup, blakpela sos, pepa, sol. Kukim liklik taim tasol na putim mit. Kukim liklik taim moa. Kisim kaukau yu kukim pinis, paitim strong, lainim arere bilong bilong dis na putim mit namel.



NUPELA AIDIA LONG AFRIKA

Long Afrika ol i kirapim pinis wanpela asosiesen i kolim "African Women's Development Task Force". Ol memba long dispela asosiesen i gat laik tru long helpim ol meri i stap long ol viles.


Asosiesen i laik helpim ol meri long painim we o rot long kirapim ples bilong ol. Tingting bilong asosiesen i olsem: sapos sampela savemeri i go insait long ol wan wan viles na sindaun wantaim ol viles meri, ol i ken helpim ol as ples meri. Ol i ken helpim ol long painim rot long kirapim viles bilong ol.

Ol asosiesen i ken wok wantaim ol viles meri long stretim sindaun bilong ol pipel. Ol asosiesen i ken harim wari bilong ol meri na wok long pinisim ol dispela wari.

Taim ol asosiesen meri i kamap long ples, ol as ples i mas givim kaikai long ol. As ples i mas lukautim ol na painim ples bilong slip na olgeta liklik samting taim ol i stap long viles.

Asosiesen meri i mas promis long stap wantaim ol inap long sampela mun. Na tu taim ol meri i wok, ol i no ken kisim pe. Ol i mas tingting long helpim pipel na kantri. Ol i no ken tingting long mani tasol.


Dispela asosiesen i bin salim pinis planti meri i go insait long ol sampela kantri long Afrika. Ol i helpim tru ol as ples meri long kisim save long helpim kantri bilong ol.



POPO MIT

I popo, muli, herbs, anian, sosis, 1 bikpela spun gris.

PASIN: Katim popo na rausim bel. Putim blut muli na abusim mit, herbs, anian. Putim insait long popo. Kukim long dis i gat gris liklik taim.




GAVMAN I KROS LONG OL DRES

Long Tanzania, wanpela kantri long Afrika, gavman i kros long ol kain kain dres bilong ol yangpela meri. Dispela kros i no bilong nau. Nogat. Dispela kros i stap long taim tru samting olsem 9-pela yia. Insait long dispela 8-pela yia gavman i tokaut planti, tasol planti ol yangpela meri i no bihainim tru tingting bilong gavman. Ol i save pasim sotpela dres, ol i gat kain kain kros i pas tru long bodi bilong ol, na ol i proksaitim gras bilong ol.

Gavman i ting ol dispela kain dres i no dres tru bilong ol pipel bilong Tanzania. Em i wanpela kain dres bilong ol arapela kantri na ol yangpela meri, na sampela man tu, ol i bihainim dispela kain pasin na lusim tingting long ol gutpela pasin bilong ol pipel bilong Tanzania.

Tasol wanpela Memba bilong Palamen, Misis Makota, em i tok olsem: "Ol meri i pret bai ol boipren bilong ol i bihainim ol meri i gat sotpela dres. Olsem na ol i no pasim longpela dres. Na ol i no laik bihainim dispela tok bilong gavman."

Ol meri tu i ting ol samting bilong dres bilong ol em i samting bilong ol meri stret. Na ol man i gat pawa long toktok planti long pasin bilong ol meri long dres. Ol pipel tu i no klia tumas long dispela lo bilong gavman. Sampela i laikim na samting ol i ting em i samting bilong ol wan wan meri, laik bilong ol. Tude, long 1978, i luk olsem, sampela hap ol i bihainim dispela lo tasol planti i bihainim laik bilong wan wan.



SIR TORE LONG LAE



Long Fraide, 7 Epril, Morobe Provins i kisim provinsal gavman bilong em, na gavana jeneral, Sir Tore Lokoloko, i bin givim dispela tok long nupela primia, Mista Pama Anio na ol memba bilong nupela provinsal gavman:

"Ol pipel i bin ilektim yupela olsem lida bilong ol. Em i min yu mas nau tingting pastaim long ol pipel na bihain tasol, long yupela yet na laik bilong yupela."

"Yupela i mas go pas long ol pipel na givim gutpela eksampel insait long opis bilong yupela na insait long haus bilong yupela tu. Yupela no ken tubel. Yupela no ken mekim wanpela kain pasin long gavman, na narakain pasin long famili bilong yupela. Inap 24 aua long wan wan de, olgeta samting yupela save mekim, ol pipel i ken singaut long ripot bilong em. Laip bilong yupela i no bilong yupela, i bilong ol."

"Bai planti pipel i kam long yupela wantaim wari bilong ol. Yupela mas skelim ol gut, na ausait o kala o klos bilong ol i no ken

Taim em i opim Lae Spesel Edukesen Senta, Sir Tore i tok olsem: "Mi belgut tru long lukim hamas wok ol papamama na ol pren bilong ol tarangu pikinini i bin mekim insait long dispela tupela yia long kamapim dispela senta. Mi tok amamas long yupela olgeta."

"Yupela i save, sapos wanpela pikinini i arakain liklik - em i no save harim gut o lukluk gut, o sapos em i han lek nogut, dispela pikinini i mas gat gutpela mama na papa na pren tru. Long wanem, tarangu ya i no inap mekim planti samting em i lai mekim. Em i bikpela samting, yumi skulim ol dispela tarangu long kisim gut save bai ol tu inap long kisim ples bilong ol insait long bikpela komyuniti."

"Dispela skul em i mekim spesel wok: em i trenim ol papamama i gat kain pikinini olsem. Ol tisa i helpim ol, i skulim ol. Bipo i no gat samting olsem."



tanim tingting na bel bilong yupela. Yupela mas ting: dispela man/meri i wantok; mitupela i wanfamili. Nogut yupela karamap tasol long olkain wok long opis na yupela no gat taim long lukim ol pipel. Nogut yupela ting ol pipel i rabis tasol. Ol yet i bin ilektim yupela."

TAMBUIM OL MUVI NA BUK NOGUT

Minista Ebia Olewale, Minista bilong Tret na Foren Afeas, i bin askim Melanesian Kaunsil bilong ol Sios long makim wanpela tokman bilong ol long kam insait long wanpela grup bilong bosim ol muvi na buk nogut, bai ol i tambu long kam insait long kantri. Pasto Dick Avi bai kisim dispela wok long nem bilong olgeta sios. Sapos yu laik komplem long sampela buk o poto o muvi, yu rait i go long em long dispela adres: P.O. Box 1015, Boroko.

Poto antap i soim Sir Tore Lokoloko long Port Moresby long gaden bilong bikpela haus bilong em, olsem gavana jeneral, taim em i tilimaut olkain medal bilong kwin na bilong gavman. Na hia yu ken lukim em i putim medal long siot bilong bosman bilong biktaun Lae, em Mista Timothy Pohal. Ol tok long raithan long dispela pes em i bin givim, taim ol i bin sanapim nupela provinsal gavman long Lae.

Maxell i nem yu ken bilipim. Baim em tasol.



YU KEN BAIM LONG OL DISPELA HAGEMAYER STUA


P.O. Box 673, MADANG
PHONE: 822445

P.O. Box 1428, BOROKO
PHONE: 256144

P.O. Box 90, LAE
PHONE: 423200

P.O. Box 63, RABAU
PHONE: 922633

P.O. Box 11, MT. HAGEN
PHONE: 52 1339



SUNAM KONA

MANUS TIN PIS FAKTORI

Tupela ofisa bilong World Bank i bin lukluk raun long Manus Provins, we bai ol i putim wanpela Faktori bilong wokim ting pis long en. Dispela Faktori bilong wokim tin pis bai ol i sanapim long Lombrum long Los Negros Ailan.

Mr. Richard Schatz em i wanpela ekonomist na Mr. Jack Manyard i bin go long Lombrum long lukluk long ples bilong wokim dispela Faktori bilong wokim tin pis.

Starkist kampani bai wokim dispela Faktori, em bai go pas tu long wok bilong kisim pis insait long solwara long Manus. Mr. Richard Schatz na Jack Manyard i bin mekim tu toktok wantaim ol bigpela ofisa bilong Provinsal Gavman wok bilong statim Faktori bilong tin pis na nupela bris long Lorengau.

Wanpela Bosman bilong Dipatmen bilong Didiman, Mr. Joakim Kupe i bin tok olsem, dispela Tin Pis Faktori bai halivim tru wok bilong ekonomik bilong Manus Provins na tu Papua New Guinea. Mr. Joakim Kupe i tok olsem, dispela tu bai givim wok tu long planti Manus pipel em ol i pinisim skul bilong ol na i

no gat wok.

Wantok Repota long Manus, i save olsem Nesenel Gavman bai lusim samting olsem wan milion kina long wokim dispela Faktori bilong wokim tin pis long Manus Provins.

WESTEN AILANS

Mi laik askim Manus Provinsal Gavman, long lukluk long bigpela hevi bilong ol pipel long Western Is.

Mipela i gat bisnis long copra, shells, pis tasol i nogat gutpela rot long wokim gut bisnis bilong mipela. Plenty taim copra bilong mipela i save bagarap. Mipela i save gat ol pipel i save sik nogut na mipela i laik long salim i kam long bipela haus sik tasol i nogat rot na plenty pipel bilong mipela i save dai. Western Ailan em i hap bilong Manus tasol i nogat gutpela servis.

Mi laik askim Provinsal Gavman long halivim mipela na putim wanpela ship i go long Western Ailan.

MANI BILONG HAUS

Premia na wokman bilong polosy sekiteriat bilong Manus Provinsal Gavman wantaim komiti bilong Hausing komiti bin

tokaut kivung, Manus Provinsal gavman bai kisim K30,000 tasol na i no K125,000 olsem pastaim ol i bin promis.

Dispela kivung ol i bin mekim long toktok long ol graun em gavman na kaunsil papa long en insait long Lorengau long wokim ol nupela haus. Dispela wok bilong wokim ol haus bai hausing komisin bai wokim. Mr. Paulus Gabriel namba wan polosy sekiteriat bilong Manus Provinsal Gavman i tok bihain long kivung olsem Manus Provinsal Gavman i no hamamas long Nesenel gavman i no givim i nap moni long wokim ol haus em kos bai inap K125,000. Nau ol i senisim i go long K30,000 long wokim ol haus long Manus Provins.



KISIM BIKPELA TRENING

Mr. James Ponor em i wanpela man i save skulim

ol Aid Post Orderly na skulim ol pipel long pasin bilong Helt bai i go kisim 10-pela mun kos bilong em long London University long Englan. Em i marit na i kam long Pak Ailan long Manus Provins.

Mr. James Ponor i tok, World Health Organisation insait long bilong United Nations na PNG Gavman bin tok orait long kisim dispela skolasip. Insait long dispela kos bai ol i lainim long pasin bilong toktok long ol pipel long ol ples, tok kilia long pasin bilong stretim ol kain kain sik i save kamap long PNG, wei bilong kisim gutpela skul long lainim ol Aid Post Orderly na ol narapela bigpela skul insait Pablik Helt.

Mr. James Ponor i tok, ol kantri olsem PNG, India, Malaysia, Indonesia, Singapore na ol narapela kantri long South East Asia i bin stap long dispela skul. Em wanpela tasol bilong PNG bai istap insait.

Dispela kos i stat long namba 4 de mun October 1978 na pinis namba 11 de mun July 1979. Mr. James Ponor i tok em i amamas long W.H.O insait long bilong United Nations givim em dispela skolasip or skul. Taim em pinisim dispela skul em bai kisim hap pepa ol i kolim Diploma in Health Education.


PROVINSAL GAVMAN YUSIM MANI

Manus Provinsal Gavman bai kisim K1,395,499 i kam long bigpela wok insait long Manus Provins. Fainens Minista, Karol Molian bin tokaut long kivung bilong en. Nesenel Gavman bai givim dispela moni long mekim ol bigpela wok long dispela yia 1978. Dispela taim Nesenel Gavman bihainim kalander yia long brukim ol moni i go long ol provinsal Gavman bilong wan wan provins.

Fainens Minista i tokim ol memba Laban Assembly olsem. Laban kabinet bin tokaut pinis, bigpela ofis bilong Manus Provinsal Gavman i kos K13,000, ol liklik haus bilong kilinik kos K9,000, nupela liklik wok i kos K20,000, Bisnis bilong wokim sia kanda i kos K2,000, Depatmen bilong Decentralization kisim K18,400. Na wok bilong wokim pility Aid post i kos K500,000.

Minista bilong Fainens, Mista Barry Holloway, i tok save olsem: Gavman i bin makim narapela wan milion kina bilong helpim kain kain wok long ol provins. Provins i laik kisim sampela dispela mani, i mas askim dipatmen bilong fainens bipo long 19 Me

TULTUL TITAN



Mitupela i laki tru TULTUL TITAN i wokim banis wantaim strongpela 6/700 mm TITAN HINGED JOINT waia banis, sapos nogat bulmakau bai kikim has bilong mitupela



Titan (NG) Pty Ltd. P.O. Box 25 Lae Ph 423988. 423497



NARAKAIN ET POS I WIN

Provinsal Memba bilong Manus, Mista Michael Pondros i no amamas long tupela ofisa bilong Viles Developmen i bin kam mekim lukluk raun long Pility Et Pos long Saut Manus.

Dokta Philip Kamei i wanpela spesel dokta i save moa long sik T.B. na Leprosi na Dokta Paulus Kamara Pego em i wanpela Saintis.

Dokta Kamara Pego i bin tok, em i amamas long ol wok bilong Mista na Misis Luke Silih Tau long Pility Et Pos. Em i bin kirap nogut long lukim olsem marasin bilong tumbuna ol i wokim long skin diwai i ken pinisim ol sik. Dispela bihainim stret 8-pela bikpela finging bilong Nesenel Gavman. Dokta Kamara Pego i tok, Pility et po bai kisim wanpela spesel prais. Dispela i min olsem Pility et pos bai kisim helpim long gavman inap 2-pela yia.

Tasol Provinsal Memba bilong Manus, Mista Pondros i tok kain helpim i mas i go long ol et pos bilong gavman o misin long wanem Pility et pos ol i no bin registretim olsem et pos tru. Em i wanpela long ol memba long palamen, bin pait hait wantaim bikgavman long gutpela sindaun na pe bilong et pos odeli. Mista Pondros i go het na i tok, tupela dokta ya Dokta Philip Kamei na Dokta Paulus Kamara Pego i mas kisim tok orait long em pastaim long tupela i kam mekim lukluk raun. Dispela i min olsem tupela i no rispek long em olsem memba bilong nesenel palamen long Manus.

Mista Michael Pondros i tok Nesenel Gavman i mas tingting gut nau na givim dispela 2-pela yia helpim i go long Pility et pos. Dispela et pos i no helpim olgeta pipel em i helpim tasol liklik lain insait long dispela hap na 10-pela i bin dai pinis long dispela

et pos. Em i go het na i tok sapos gavman i no lukluk gut bai i gat pipel i bihainim dispela et pos.

Dispela kain helpim i kirapim planti tasol planti toktok na bilip bilong wok politik. Dokta Kamara Pego i tok dispela et pos long Pility i mekim oraitim pinis 6 tausen pipel.

Sampela pipel i bin tok olsem: Mista na Misis Luke Silih Tau i mekim oraitim planti long bilip bilong kago kal tasol dispela i no tru. Dokta Kamara Pego i tok ol i bin testim pinis ol marasin bilong tupela marit long haus sik long Port Moresby na em i wan-kain olsem marasin bilong ol narapela kantri.

Wanpela sinsia pablik sevan na kaunsila bilong Lorengau taun kaunsil, Mista Barnabas Kombil i no laikim toktok bilong Mista Nick Purai.

Long ol toktok bilong Nick Purai, em i tok gav-

(i go long pes 12)

AVELING-BARFORD PACIFIC for your compaction requirements.


Vibratory Plates

Vibratory Rammers

Pedestrian Vibratory Rollers

(Double drum hydrostatic drive)

Agents for bearings and hose fittings Ryco-flex Nachi



AVELING-BARFORD PACIFIC PTY. LTD

Head office: Ume Street, Gordons, Port Moresby, Port Moresby.

PO Box 6457. Phone 257166 Telex NE22206

Lae depot: Morobe Avenue, PO Box 1191, Lae Phone 424188 Telex NE42411

MISTA THOMAS KAVALI

Minista Bilong Komisin Bilong Bosim Ol Haus
Membra bilong Jimi Open

Mista Thomas Kavali i gat 33 krismas na mama i bin karim em long yia 1944 long ples Maegmol long hap bilong Jimi Riva long Westen Hailans.

Em i bin skul inap standet 4 long skul long Tabibuga. Na standet 5, na 6 em i bin wokim long Maun Hagen. Bihain em i bin kisim tu yia fama trening long Madang. Long Julai 1965 em i bin go tren inap 6 mun long kamap woda plis long Bomana Korektiv Institusen Koles long Port Moresby. Em i bin wok inap 3 yia stret olsem woda long Lek Kopiago Korektiv na narapela 5-pela mun long Tabibuga Korektiv.


Wok politik bilong em i bin stat tru long 1969 taim ol i gat wanpela bai ileksen long hap bilong em. Em i insait na i winim ileksen na inap nau em i member bilong Jimi Open. Bipo em i memba bilong Jimi Lokal Gavman Kaunsil na tu memba bilong Distrik Edvaiseri Kaunsil long hap bilong em.


Mista Kavali em i siaman na lida bilong Niugini Nesanel Pati.

Em i bin go lukluk raun long Solomon Ailan, Nu Hebrides, Fiji, na Australia.


Mista Kavali em i Katolik, i marit, na i gat wanpela pikinini. Em i save tok Inglis, Pisin, na 3-pela tok ples bilong hap bilong em.


Long las gavman em i Minista bilong bosim ol Wok. Nau em i Minista bilong bosim komisin i lukaut long ol haus bilong gavman, em ol haus ol pablik sevan i yusim.





THE INVESTMENT CORPORATION OF PAPUA NEW GUINEA





Long poto antap yumi ken lukim sampela man bilong Tari long Saten Hailans i sanap holim winmani ol i bin kisim long Invesmen Koporesen ofis klostu long ol.

. BAIM SEA LONG INVESMEN KOPORESEN
BILONG PAPUA NIUGINI

*na bai yu kisim winmani bilong wanpela
bikpela bikpela kampani tru*


Sapos yu laik save moa long we bilong kisim
winmani, yu rait long: Investment Corporation
P.O. Box 155
Port Moresby

NEM BILONG YU:

ADRES BILONG YU:



TOK SAVE I GO LON



Dispela em i sotpela hap tasol bilong ol tok i stap long bikpela pepa bilong NIDA

SAPTA I · TOK I GO PAS

SAPTA II · OL BIKPELA WOK GAVMAN I LAIK KIRAPIM PASLAIN:

Gavman i pilim olsem, sapos ol ausait kampani na bisnisman i no putim mani na wok insait long ol dispela samting insait long ol yia i laik kamap nau, developmen bilong Papua Niugini i no ken go het gut.

Em hia lista bilong olkain spesel wok, we gavman i laikim ol ausait bisnis na kampani i mas insait na kirapim na ranim:

Wok long kopa na wel

Gavman i ting olkain we bilong mekim go het wok kopa o wok bilong painim wel na gas na ain na arapela samting aninit long graun - em i mas namba wan olgeta. Na em i singautim ol kampani long kam insait na statim o skruim wok i go long painim ol dispela kain samting - long olgeta hap we sampela arapela kampani i no bin kisim tok orait pinis.

Wok Egrikalsa

- ... Wok long groim na redim lip ti long maket
- ... Wok long groim soya bin na rais na mais
- ... Wok long groim na kirapim wok suga

Wok Timba

Bungim na ranim olgeta wok timba long ol dispela hap:

- ... Sagarai-Gadaisu Timba Eria
- ... Vanimo Timba Eria
- ... Kapuluk Timba Eria

Gavman i ting olsem: gutpela wok timba long wanpela eria olsem i min kampani i mas yusim gut olgeta diwai na tri long dispela hap bilong helpim kantri na provins na ol pipel bilong dispela hap yet. Nau tu em i mas kisim winmani inap long save na sea bilong em. Em i min gutpela wok timba i mas ting long ol dispela samting:

- (a) planim gen nupela tri, o wokim bikpela fam long ples i no gat tri moa
- (b) helpim dispela hap i no gat tri moa, long kirapim nupela kain bisnis
- (c) soim timba
- (d) wokim plaiwut long timba
- (e) katim ol diwai nabaut liklik liklik na salim long kampani i wokim pepa
- (f) statim faktori bilong wokim olkain samting long diwai
 - 1.) mekim drai ol timba
 - 2.) wokim kain kain samting long diwai
 - 3.) wokim plaiwut
 - 4.) wokim olkain sea, tebol, bet, srang, - o redim diwai long ol dispela kain wok

Wok Long Lukaetim Pis

(I) Mekim go het wok bilong atun.

Em i min olsem:

- (a) Ol i mas hukim na umbenim inap 100,000 tan atun long wan wan yia
- (b) Mekim wok tru i min, ol i mas:
 - 1.) gat lain spesel sip bilong painim pis wantaim longpela pilain na spesel umben
 - 2.) putim ol faktori long nambis we ol inap putim pis long frisa na mekim olkain wok bilong rausim bel na tel na het bilong ol pis, mekim wok bilong statim ol atun long tin, mekim wok bilong statim ol atun long tin, mekim wok bilong statim ol atun long tin, mekim wok bilong statim ol atun long tin, pis ol i no bin yusim
- (c) Namba wan ples tru bilong wokim ol dispela statim faktori em long ol atun long tin: Manus, Nu Ailan, Nu Briten, Not Solomons. Long wanem planti pis atun kupa baunt long solwara long ol dispela hap.

(II) Mekim go het wok bilong groim na painim ol kindam na kramsel

Dispela i min:

- (a) ol ausaitman i ken ranim tasol dispela kain bisnis, sapos papa bilong bisnis i ol

lokal pipel tasol.

- (b) Ol i mas baim ol dispela samting bi na painim. Olsem kampani i no mas
- (c) Kirapim pasin bilong salim long m rip, kain samting bilong solwara
- (III) Kirapim bisnis bilong painim pis bot o sip.
- (IV) Gavman tu i laik bai sampela ka na kain kain samting olsem aninit lo

SAPTA III · OPEN BISNIS

Olgeta kain wok i no bin stap anin: sapta IV - ol dispela wok namel, i ols long ol ausaitman na ausait bisnis i ken wan wok na tingting na aida na em t ol lo i stap insait long sapta V.

Bilong helpim ol ausait bisnisman n dispela nupela bisnis, gavman i laik me Gavman i ken orait long ol ausait ranim sampela bisnis i no stap long nupela bisnis inap long helpim go l skelim ol na i pasim tok wantaim ol I gat sampela kain spesel bisnis pani i ken kirapim, na olsem gav ol.

. . . . Sapos long lista daunbilo i no g kampani i laik kirapim, em i ken wan hap o provins bilong kantri pinis na ol samting i no bin ran g ken bringim planti wari na trabel man i laik save na skelim gut. N. pela kain wari na tingting, sapos c

GAVMAN I LAIKIM OL AUSAIT KA DISPELA KAIN WOK

- (a) Groim kaikai
- (b) Groim olkain prut tri
 - (Sapos ol dispela kaikai na prut i b kai; o sapos ol i groim kaikai o p kaikai long tin)
- (c) Groim wel pam (bilong statim as w
- (d) Groim gumi o raba
- (e) Groim kakao
- (d) Groim olkain pikinini bilong saye fama
- (e) Groim kawawar na pepa na kain sa
- (g) Groim sampela nupela kain kaikai
- (h) Groim ol wel abus ol i kolim dia.
- (i) Kirapim kain kain wok timba insait
 - 1. Kumusi Timba Eria
 - 2. Kapiura Timba Eria
 - 3. Umboi Ailan Timba Eria
 - 4. Manus Ailan (bihain gavman i ba
 - 5. Jimi Timba Eria
- (i) Groim kiau bilong golip sel
- (j) Groim kindam
- (k) Groim ol maleo
- (l) Groim ol kain kramsel bilong kaikai
- (m) Groim ol kuka bilong mangro
- (n) Kirapim bisnis bilong salim ol nais (long dispela bisnis na bisnis bilong pani yet i ken mekim wok bilong maleo na kramsel na kuka, kramsel dispela wok pinis.)
- (o) Kirapim faktori bilong wokim o den, long ol pis, long ol diwai, lor i ken salim ol dispela samting long
- (p) Wokim sampela faktori bilong wok gut hia o salim long ol ausait kantr
- (q) Wokim olkain samting i save help



Iwara long ol lokal man i bin lukautim
: bilong em yet.

kain kindam, na kramsel, na pis bilong

ambis yet - na i no wantaim ol bikpela

kam insait na traim painim wel na ain
vara.

Sapta II na olgeta wok i no stap long
n bisnis. Em i min gavman i ken orait
insait mekim. Gavman bai skelim wan
m sapos dispela nupela wok i bihainim

i na kampani long kam insait ranim ol
pela tok save:

ii na bisnis i ken kam insait, statim na
namba II. Sapos gavman i ting dispela
ng Papua Niugini, em bai larim NIDA i

t, gavman i laikim tumas ol ausait kam-
mekim isi long ol kampani i laik ranim

bilong wanpela bisnis o wok wanpela
i no laikim dispela kain wok long wan
pela taim ol i bin gat dispela kain wok
sampela taim wanpela kain spesel wok i
l pipel long wanpela hap. Olsem na gav-
man i skelim ol nupela kampani long ol dis-
kam insait.

II KEN KAM INSAIT LONG OL

elpim sampela hap kantri i sot long kai-
ong helpim bisnis bilong putim dispela

ng kirapim plantesin

umu o kaikai - bai ol ken salim long ol

olsem
salim long ol ausait kantri

ol dispela eria

un pinis)

p
m kiau bilong golip tasol, ol ausait kam-
sol long ol arapela wok bilong kindam na
tas wok wantaim ol lokal pipel i mekim

nupela samting long ol kaikai bilong ga-
umting i kam aninit long graun - bai PNG
ait kantri.

nupela kain samting mipela i ken yusim

ol i mas gat long wok fama, wok timba,

na arapela kain wok insait long kantri - bai yumi no mas baim ausait.

- (r) Putim olkain sayor na kumu na prut insait long tin
- (s) Wokim olkain haus yu ken sanapim isi
- (t) Wokim olkain tul bilong wok long gaden na woksap
- (u) Wokim ol liklik bateri bilong redio samting
- (v) Wokim na fiksिम olkain sip
- (w) Bosim ol bikpela wok we ol lokal wokman i no gat save inap long en
- (x) Helpim ol lokal pipel long salim ol kaikai samting bilong fama na wok fam i go long ol arapela kantri
- (y) Ol samting bilong mekim go het wok turis: ranim ol hotel, ples pilai, na ol samting bilong mekim turis i laikim kantri.
- (z) Ol kain spesel wok i mas gat spesel save - olsem spesel mekenik o pailot o kain samting olsem.

SAPTA IV - OLKAIN WOK I TAMBU

Dispela em i lista bilong olkain bisnis o wok, we ol ausait bisnisman i tambu long kam insait statim bisnis bilong em yet, o baim bisnis bilong lokal man.

- (a) Mekim wok gol
- (b) Groim kokonas (sapos em i no wanpela spesel nupela kain)
- (c) Groim kopi
- (d) Groim ol kakaruk bilong salim olsem mit
- (e) Groim plaua orkit
- (f) Ranim bisnis bilong groim tret slika
- (g) Bisnis bilong bungim na baim na salim olkain samting bilong bus olsem skin diwai, olkain plaua, na lip na rop.
- (h) Lukautim na sutim ol pukpuk
- (i) Ranim smolpela pukpuk fam (aninit long 5000 pukpuk)
- (j) Bisnis bilong bungim na baim na salim olkain smolpela samting bilong bus olsem binatang, bataflai, snek, gras bilong pisin, tit bilong pis na dok na pik.
- (k) lukautim pis long ol riva na raunwara
- (l) Mekim wok kopra
- (m) Mekim wok kakao (sapos yu no gat plantesin)
- (n) Mekim wok kopi
- (o) Mekim wok pinat
- (p) Printim olkain mak long laplap na klos na singlis
- (q) Wokim olkain bilas long han o long lum.
- (r) Wokim kain kain kaving long masin
- (s) Mekim bisnis long baim na salim kopra
- (t) Mekim bisnis long baim na salim kopi ovasis
- (u) Mekim bisnis long baim na salim kakao ovasis
- (v) Salim ol plaua orkit ausait long plaua stua
- (w) Salim ol kaving samting
- (x) Ranim ol tretstua long ples
- (y) Raun long trak na salim olkain samting olsem long stua
- (z) Ranim petrol stesin
- (aa) salim olkain klos i no nupela
- (bb) Ranim smolpela haus kaikai, i no gat 6-pela wokman long en
- (cc) Ranim haus dring - i no stap long hotel
- (dd) Ranim ol PMV - i no bilong gavman
- (ee) Ranim-haus spot o pilai
- (ff) Wokim bisnis dinau long olkain masin bilong pilai o tilim sigaret o loliwara
- (gg) Bisnis bilong fiksिम su

SAPTA V OL LO BILONG BOSIM KONTRAK BILONG OL AUSAIT BISNISMAN I LAIK WOK HIA

Insait long dispela hap, ol bisnisman i ken painimaut olsem wanem ol i ken skelim winmani bilong ol, hama bai ol i mas pe long statim wanpela nupela wok. Olkain kontrak i stap insait. I gat lista bilong olkain mani na olsem wanem em i skel wantaim kina. Ol kain kain prais insait long PNG i stap long lista. Bai dispela nupela bisnis i mekim wanem long ol PNG bisnis - i helpim o nogat? Wataim na olsem wanem gavman i ken tekewe bisnis? Na wan wan spesel bisnis i gat spesel tok save na skul long helpim em.

SAPTA VI - WANEM BISNIS I AUSAIT LONG PAWA BILONG NIDA

Hia em i lista bilong wanem ol kain ausait bisnis i ausait long ol lo bilong NIDA

Dispela tupela pes i soim sotpela lo tasol. Sapos yu laikim wanpela kopi bilong bikpela lo, orait, yu rait tasol i kam long :

Executive Director, National Investment and Development Authority

P.O. Box 5053, Boroko.

Telipon namba: 25.8777

Opis bilong dispela departmen i stap long PNG Developmen Beng, Waigani

PAIT LONG WABAG PLES BALUS

NARAKAIN ET POS I WIN

(i kam long pes 8)

Long namba wan de bilong yia 1978 Dipatmen bilong Transpot i bin pasim ples balus long Wabag. Inap nau ol i no bin opim bek.

Nau long Wabag na long Enga ol i longlong nabaut. Long wanem Eria Atoriti i bin makim K10,000 bilong lukautim gut dispela ples balus na i no laik tru nesenel gavman i ken pasim. Long wanem Wabag em i senta na hetkota bilong Enga provins, na em i nogut em i no gat ples balus bilong em stret. Inap planti yia nau olkain bikpela balus, DC3 tu, i bin kamdaun hia. Na i no gat wanpela birua.

Gavman i strong long Wapenamanda em i mas

bikpela ples balus, na i tok, i gat gutpela rot namel long Wapenamanda na Wabag. Em i tru liklik. Tasol long Wapenamanda i no gat planti haus yet i stap long mekim wok balus. Na planti taim ol pipel bilong Wabag i draiv inap hap aua na moa na i kamap long Wapenamanda na i no gat balus i kamap. Ol i no ken lusim ka bilong ol tu long ples balus, bai em i lus olgeta.

Na narapela samting, nau tasol Enga Provinsal Gavman i wokim olgeta nupela ofis bilong em long Wabag, long arere bilong ples balus. Na ol i pilim, em i kranki long pasim ples balus.

Tasol long narapela sait

bilong stori, ol hausing komisin i bin wokim olkain plen pinis bilong yusim dispela ples balu. Long wanem long Wabag taun ol i no gat planti graun. Ol i laik karamapim ples balus long olkain haus.

Planti smolpela bisnis na misin na eria atoriti tu i painim hevi long gavman i bin pasim ples balus. Nau planti liklik ples tru long provins i gat ples balus, tasol hetkota i no gat.

Sampela politik tu i hait insait long stori, long wanem Sir Tei Abal em i bilong hap bilong Wabag stret. Na Minista bilong Hom Afeas, Mista Pato Kakarya em i bilong Wapenamanda.



man i mas lukluk na yusim ol marasin bilong tumbuna, Mista Purai i tok sapos nesenel gavman i larim tumas ol pipel long yusim tumbuna marasin. Dispela bai stopim ol pipel long i no ken kisim ol marasin bilong narapela kantri na tu stopim ol dokta long kam wok.

Tasol Mista Barnabas Kombil i tok em i luk olsem Mista Purai i no bihainim dispela hap tok bilong gavman long selp rilaiyens o helpim ol yet. Mista Kombil i go yet na i tok dispela selp rilaiyens em i stap insait long dispela 8-pela bikpela tingting bilong nesenel gavman. Em i go het na i tok ol pipel bilong Manus Pro-

vinsal na PNG i mas sanap long lek bilong ol yet. Dispela bai divelopim kantri bilong yumi.

Mista Barnabas Kombil i tok ol dispela marasin bilong tumbuna i wankain olsem ol marasin ol i odaim i kam long ol narapela kantri. Dispela ol marasin bilong Pility et pos ol i bin yusim na testim pinis long bikpela haus sik long Port Moresby.

Is Nu Briten Provinsal Gavman i gat 18 komyumiti gavman aninit long en. Nau ol i wari long makim arere namel long ol dispela komyumiti. Ol i laik bai ol pipel i gat wankain tok ples i mas insait long wanpela komyumiti.

PNG



Sapos yupela laik kirapim bisnis bilong prinim pepa kam lukim mipela long PNG Printing na bai mipela halivim yupela

vokesen ripot



Poto i soim Mista Heno Boe bilong Dipatmen bilong bosim Graun long PNG i stap hia long Melbourne i lainim pasin bilong putim olkain tok save long ol liklik film. Dispela em i nupela pasin bilong ol ofis. Ol film i yusim liklik spes tasol.

Poto i kam long Australian Information Service, Terry Rowe i kisim.

Dispela em i wanpela ripot long soim wanem olkain samting ol i save mekim long wanpela vokesenel senta bilong gavman. Dispela senta i gat 145 studen long en na hia ol i ripot long nupela yia bilong ol.

Studen Kaunsil

Studen Kaunsil i kibung olgeta Fraide apinun. Em i pinis long 3 klok, tasol olgeta studen i no mekim sampela tok insait long miting o i no givim sampela aidia, ol i mas stap bihain long miting na wok kalabus inap long 5 klok. Nau olgeta i save kam na mekim gutpela kibung. . . .

Helpim Treni

Senta i helpim 24 treni inap long K13,322,41 long helpim ais blok bisnis bilong ol nabaut long kantri. Inap nau ol i no bin bekim sampela dispela dinau mani yet.

Hamas Studen

Pastaim i gat 174 treni long namba wan yia. Ol i baim skul fi bilong K35. Tasol 45 bilong ol i bin

ting dispela skul i hatwok tumas na i no gat inap kaikai long ol na ples i no nais inap long ol. Olsem na ol i kisim bek mani bilong ol na i go bek long ples.

Senta Mani

Long dispela skul bilong 146 studen, provinsal gavman i givim K90 long lektrik lait long mun, K4.50 long telipon, K86 long kaikai, K75 long baim kain kain samting long gavman stua. Em tasol. Bipo ol i kisim moa.

Draiv skul

Ol studen tu i tren long draivim ka na motobaik. Ol i ken mekim olgeta de long 4 klok apinun inap 6:30, na long olgeta de long wiken. Tasol i tambu long draiv long nait.

Soim muvi

Sampela treni studen i soim sampela muvi film olgeta fotnait long 3-pela ples. Ol pipel i baim long 15 toea, 15 toea. Ol i gat wanpela smolpela masin bilong mekim lektrik pawa i go wantaim.

Popkon

Popkon em i wanpela kain mais i save solap sapos yu kukim long paia. Ol manki na bikpela pipel tu i laik kaikai popkon; em i swit moa. Senta i bin kisim 20 bek mais bilong dispela na i kirap kukim popkon. Long namba wan wik ol i winim K51.60. Skul i baim 7-pela spesel masin bilong statim popkon bisnis long 7-pela ples long PNG.

Fiksim taia

Mipela save winim gutpela mani long fiksim taia bilong ol draiva.

Petrol stesin

Olgeta mun mipela i save yusim na salim 1,500 galon petrol.

Ol taipraitia

Ol 24 taipraitia o masin bilong rait i mekim save tru inap long 18 aua long wan wan de. Ol studen i paitim ki bilong ol tru. Ol i skul tu long stretim ol, sapos ol i bagarap.



Strong Tru.

HUSKY DYNA

**Niupela trak bilong Toyota i save wok hat tru.
Yu laik karim kago o pasindia – long biktaun
o rot nogut long bus – dispela trak em inap.**

TOYOTA

BRANCHES AT: PORT MORESBY 25 4088 LAE 42 2322 MT. HAGEN 52 1888

ELA MOTORS LIMITED

MADANG 82 2188

RABAU 92 1988

KIETA 95 6083

WEWAK 86 2255

GSP ET 013P



**MIPELA GAT SAMPELA
SPESEL BALUS BILONG
KARIM KAGO**

EM HIA KAGO BILONG WANPELA BALUS

**Sapos yu laik samting i kamap hariap
orait, yu putim long balus tasol**

Kukamba kamap

Bipo tru tupela boi i gat mama wantaim papa. Tasol mama wantaim papa tupela i dai pinis na ol i planim bodi bilong papa longwe long haus. Na bodi bilong mama ol i planim o putim em aninit long haus bilong tupela. Ol i putim nating long aninit long haus. Na trangu tupela i no gat kaikai na i stap.

Ples tupeja i stap long en ya i no gat pipol i stap long en. Tupela tasol. Oloman, hangre i painim tupela. Tasol ol wetim bodi bilong mama i ken sting pastaim. Na ol i laik go long narapela hap, tasol ol wetim mama i stap i go. Na mama i sting, tasol het i no sting, na tupela i was i stap.

I go, i go na namba wan brata i kirap i go na lukim het bilong mama bilong en. Em i go na lukluk gut na em i lukim wanpela liklik-pela samting i kamap long insait long het bilong mama bilong en. Na kwiktaim em i go na tokim brata bilong en na tupela i kam lukluk.

Sampela de bihain ol i kam, na em i kamap bik-pela pinis. Na narapela taim ol i kam luk gen ol i lukim kukamba. (Tok ples bilong mi i olsem Kimit.) Olsem tupela i stap na lukautim kukamba i stap. I go na em i karim kaikai nau. Na tupela i putim olsem yumi i no ken katim namba wan kukamba, rop i karim pes. Ol i stap i go na oloman, hangre i kukim tupela na ol i laik katim pes kukamba.

Na pes brata i laik katim tasol i pundaun long ground na ol i laik go kisim. Tasol kukamba ya i rol i go na tupela bihainim dispela kukamba i go i go. Na ol i laik go kwik na pas-

im rot na holim dispela kukamba, tasol kukamba ya i wok long trikim tupela. I go i go i go na ol i kamap long wara na dispela kukamba ya i bihainim wara i go daun. Na tupela i laik holim tasol i no inap long tupela.

Ol i wok long bihainim i go na dispela kukamba em tu em i wok long trikim tupela. I go i go tupela i kam olsem 200 mail samting na ol i kamap long ples wara i kapsait. Na pes brata i putim 60 spit tasol i go na pasim dispela wara. Na nau dispela kukamba ya i nogat rot long i go na em i kamap olsem lapun meri. Na tupela i kros nogut na i paitim dispela lapun meri na kilim em i dai. Ol i kilim em i dai na ol burukim em liklik.

Na ol i lusim na i go liklik. Dispela lapun em kirap wakabaut i go lukim tupela gen na ol i kros nogut an kilim em i dai gen.

Ol i burukim em liklik tru na putim mit bilong en longwe olsem 1 mail samting na ol i go. Na dispela lapun meri kirap na wokabaut i go lukim tupela gen. Ol mekim wan kain tasol i go i go i go inap 15-pela taim.

Na pes brata i gat gutpela aidia na em painim wanpela longpela ston olsem 2 long. Na em i tokim brata bilong en: Yu karim dispela ston i go na kukim long hap. Na yu holim long en. Yu no ken kukim. Em i karim dispela ston i go na pes brata wetim dispela lapun meri. Taim dispela lapun meri i kam antap, em tokim em: yu hangre o nogat? Boi ya em askim em olsem na lapun meri em i tokim boi: mi hangre tru. Na boi em i tokim em olsem: mitupela



Mr. Sakiba Sanameng

i stap hia na wetim brata bilong mi long bringim kaikai.

Oloman dispela lapun meri i ting i tru, na i amas i stap. Taim pes brata i lukim brata bilong en i karim hotpela ston i kam,

em i tokim lapun meri: yu opim maus na pasim ai bilong yu, na mi ken givim kaikai long yu. Na man, dispela meri em ting em i kaikai olsem na em i opim maus bilong en na ol i putim dispela hotpela ston

i go insait long maus bilong en na em i dai pinis.

Tupela i kam bek long haus na wok long kaikai long ol dispela kukamba i go. Na tupela i spak na tupela pait i go i go i kam i go i kam na tupela i dai.

BAIM WANTOK

Sapos yu laik kisim Wantok niuspepa inap long wan yia (em i olsem 48 taim), yu katim dispela tiket long sis na yu salim i kam long mipela wantaim K8.00.

Nem bilong yu.....

Adres bilong yu.....

Salim sek o mani oda inap long K8 wantaim tiket i kam long :

WANTOK BOX 1982 BOROKO

Sapos yu bilong wanpela skul o misin o klap o grup na yu laik kisim moa olsem 10-pela Wantok olgeta wik, orait, yu rait i kam long mipela na mipela i gat spesel prais long dispela kain samting.

Prais bilong go long Australia: K14.50 na long Amerika na Yurop long sip em i K18.20 na long balus em i K24.00.

WINIM MANI ISI TUMAS

PAINIM NA KISIM OLPELA TAIA I KAM
MIPELA DUNLOP I SAVE BAIM



LAE: Aircorps Rot - klostu long maket



MARITMERI WOK

Dia Edita - Nau mi laik autim liklik wari bilong mi i go long Wantok Niuspepa. Yes ol meri em i bin maritim pinis na em i gat 2-pela o 5-pela pikinini. Na ol i save wok mani long taun olsem Lae o Goroka o Port Moresby na tu long Rabaul na Arawa olsem em mi bin lukim dispela pasin em i no gutpela tumas.

Yes em i bilong wanem em ol yangpela meri ol i pinisim skul bilong ol long fom 2 na fom 3 o 4, em dispela lain meri ol i wok long painim wok tasol long ples bilong wok em ol maritmeri tasol, ol i pasim ples bilong ol yangpela meri ol i save raun raun nating long taun. Olsem na mi lukim i no gutpela pasin tru. Orait plis yu husat meri yu maritim man pinis na yu wok mani em yu ting em i gutpela tasol. em mi lukim em i no gutpela tru long ai bilong mi.

Orait em tasol liklik wari bilong mi. Em mi autim i go long Wantok Niuspepa na long husat maritmeri, yu gat-kros long mi yu mas rait i go long Wantok Niuspepa na mi mas baim na lukiuk.

Tom Hio Hintere,
Kainantu.

STILIM MANI TASOL

Dia Edita - Yes nau mi laik autim wari bilong mi long wok bilong ol et pos odeli. Halo ol brata, olsem yumi save wok bilong ol et pos odeli, em i gutpela wok bilong helpim yumi ol manmeri long bodi.

Tasol hia long provins bilong mi long North Solomons mi no save amamas tumas long wok bilong sampela A.P.O. Ol i no save wok gut tumas. Sori ol brata na wantok, mi no tok nating long dispela. Mi tok stret bikos mi lukim planti taim.

Planti taim ol i save absen long mekim wok bilong ol i save sik. Na dispela kain absen bilong ol em i no save i gat risen wai em i absen long wok bilong em long haus sik?

Dispela pasin i save mekim tait nating ol sik manmeri i wet i stap long dokta long bai i kam, tasol nogat.

Doktaboi bai em i sindaun isi isi insait long haus bilong em, inap taim ol sikmanmeri ol i go bek nating long ples na i no bin kisim sampela marasin. Dispela kain pasin i no stret long ai bilong yumi ol kristen. Plis ol APO traim na stretim wok bilong yupela. Maski long krai nating long kisim mani bilong gavman. Em yu mekim olsem yu stilim nating mani bilong gavman.

Bipo yu krai krai long pe bilong yu, yu mas traim na helpim bodi bilong mipela ol pipel. Maski long yu spak tasol. Planti taim sampela APO ol i save spak inap wan wik ol i no save mekim wok insait long wan wik.

Wanem, yu bin tren APO bilong spak tasol o bilong helpim bodi bilong mipela ol pipel.

Ol wantok, na wan solwara, mi no tok nating. Mi tok bikos mi yet mi lukim ol wantok bilong mi stret. Ol brata kain pasin hia i bilong stilim mani tasol.

Ol brata kain pasin hia i bilong stilim mani tasol.

Okei ol wantok, husat i bel kaskas long toktok bilong mi rait tasol na autim wari bilong yu.

Mi amamas tasol long lukim yu long Wantok Niuspepa.

John Tastas Rivei,
Kuraio/Not Solomons

LAIKIM PENPREN

Dia Edita - Mipela ol dispela lain meri i laikim ol

prenpren long olgeta hap bilong Papua Niugini.

Em hia nem na adres bilong mipela.

Mis Jacinta Balmon (17)
Mis Anna Yebas (15)
Mis Theresia Sadup (16)
Mis Mary Mugom (17)
Mis Mary Pia (18)
Mis Mary Anne Wasam (17)

Sapos sampela penpren i laik, orait rait i kam long:

St. Therese Convent
Catholic Mission Mugil,
P.O. Alexishafen
Madang Province



PLAK LONG SIOT

Dia Edita - Mi gat liklik hap tok long putim i go long yupela. Mi yet mi lukim long ai bilong mi long plak bilong ol arapela Papua Niugini. I no stret long ol i putim o droim flak long ol klos na T siot.

Bikos yumi i no rispektim plak bilong mipela. Mipela save yusim plak olsem mak nating long ol klos. Plak bilong ol arapela kantri i no stap long ol klos bikos ol i rispektim plak bilong ol. Na mipela PNG i no rispektim plak bilong mipela.

Na mi laik save Papua Niugin Gavman i orait na ol i wokim dispela o ol i wokim long laik bilong ol. Plis mi laik save long dispela bekim bilong pas bilong mi long yu edita o ol Wantok Nius rida.

Em tasol liklik askim bilong mi.

Sakarias W. Henky,
Turinghi/Is Sepik

SOIM MANI LONG MERI

Dia Edita - Mi laik autim wanpela wari bilong mi i go long ol lain singel man bilong Musau, em ol i stap insait long Rabaul taun. Yes ol brata Musau, mi bin lukim wanpela pasin wan wan man long yupela i save wokim insait long Rabaul taun i no stret long tingting bilong mi na ai bilong mi

Mi save lukim wan wan man long yupela i save karim mani olsem K10 na K20 na i save go raun long ol strit long painim meri. Na taim em i lukim husat marit meri o singel meri i nais tru long ai bilong em na tingting bilong em bai kamautim mani long poket bilong em na bai soim long meri. Na em bai askim meri olsem, yu laikim mani o nogat? Sapos yu laikim mani, orait yu kam na mitupela i go long haus bilong mi, o mitupela go arere tasol long bare.

Tasol mi tok sori tru long yupela. Ating yupela i lus tru long ol meri. Olsem na yupela karim mani na painim meri long taun. Ating ples bilong yupela i nogat olkain meri olsem long ol meri i stap insait long Rabaul taun. Dispela pasin yupela i save wokim long ol maritmeri na singel meri i no stret tru long tingting bilong mi. Sapos meri em i no save long yu na em i no gat laik long yu, maski long strong long em. Dispela em yupela traim long kosim trabel namel long yupela yet, na ol man bilong ol meri na lain famili bilong ol.

Ol brata, yupela i ting olsem yupela i kristen man, laka? Tasol mi ken tok olsem yupela i kristen long painim meri, na kristen bilong sin tasol. Sapos yupela i kristen tru, bai yupela tingim ol lo na oda bilong God, na bai yupela sindaun gut long taun. So em tasol liklik wari bilong mi.

Sapos yu husat Musau i

ritim dispela pas na yu gat bel hevi long en, rait tasol i go long Wantok. Mi gat moa yet tasol inap olsem pastaim.

James Wida,
Rabaul



TOK PLES I NO MAS KISIM PE

Dia Edita - Nau mi laik bekim pas bilong wantok Joseph Tomasi. Em i bin tok long Tok ples skul Tisa i no mas kisim pe long gavman. Mi no klia long wanem as yu tok long tok ples skul tisa i no mas kisim pe.

Ating yu wanpela man i gat het na yu rait nating yu raitim dispela tok i go long edita. Yes brata yu yet inap kirapim P.N.G. o sios. Ating het bilong yu i gat wara i pulap tru, yu no klia long wok gavman na misin tupela i bung na kirapim kantri. Ating yu no klia na yu raitim dispela tok.

Yu no save tru long wok bilong misin. Sios i bin sanapim dispela kantri tu. Na em i kisim Independens. Olsem na mi ken tok olsem. Brata yu no ken tok moa olsem long tok ples tisa i no mas kisim pe. Em tasol.

Rami Andia
Kentagi/W.H.P.

LAIKIM PENPREN

Leptenan Fernando A. Villacrusis bilong Lipa Siti, long Philippines, i laik penpren wantaim wanpela studen man o meri long Yunivesiti bilong Papua Niugini.

Em i laik bai ol i mas raitim long em long Tok Pisin stret.

Adres: Catalina Village
Subdivision
Lipa City 4216,
Philippines.

Mista Akoka Doi, memba bilong Ijvitari, i bin askim gavman long statim haiwe i mas kirap long Port Moresby na go inap long Popondetta long Note Provins. Em i laik bai dispela rot i mas stat long yia 1979.

Em i laikim ol ensinia i kamaut na lukim ples bilong makim dispela rot. Ol bai painim em i gutpela tru. Na rot long dispela inap bai opim wanpela hap kantri i gat graun i gut tru bilong groim olkain kaikai.

Memba bilong Kiriwin-Goodenough, Mista John Noel, em i sapotim dispela aidia, long wanem dispela rot bai helpim ol Goodenough Ailan pipel tu long bringim ol bulmakau bilong ol i kam long Port Moresby. Nau ol i mas karim ol i go long bot, na ol i westim wan wik stret long kamap long Moresby.

Mista Bruce Jephcott, Minista bilong Transpot, i tok em i gutpela aidia. Tasol yumi mas skelim olgeta wok bilong olgeta provins wantaim na lukim olsem wanem gavman inap long helpim ol.



**NUPELA KAIN
FAKTORI BILONG
TIN PIS**

Long Samarai long dispela yia ol i laik statim wanpela faktori bilong wokim tin pis. Tasol dispela faktori i narakain. Ol bai i no putim ol pis long tin, tasol insait long kain kain bek plastik. Na ol i mekim bai yu no mas putim dispela kain pis long bokis ais o frisa.

Dispela bai i no bikpela faktori tru. Em bai yusim samting olsem tupela tan pis long wan wan de tasol. Ol i laik abrusim pasin bilong putim pis oltaim long frisa. Planti ples i no gat frisa.

COLGATE I SAVE STRONGIM TIT BILONG YU



Olgeta de long moningtaim na long apinun yu mas klinim tit bilong yu. Yu mas mekim olsem:

- 1 Putim liklik gris bilong klinim tit antap long liklik brum bilong klinim tit.
- 2 Sapos yu laik bai tit bilong yu i waitpela tru na i strongpela, yu mas klinim tit bilong yu bihain long olgeta bikpela kaikai. Putim liklik brum antap long tit na pulim em i go antap na i kam daun gen, planti taim.
- 3 Nau klinim ol sap bilong tit.
- 4 Yu mas klinim tu baksait bilong tit.
- 5 Taim yu klinim tit, yu mas krungutim tru dispela liklik brum, bai em inap klinim olgeta liklik spes namel long ol tit na rausim ol pipia kaikai long en. Pipia kaikai i mekim tit i sting na i gat hul.


Dispela em i pasin tru bilong klinim tit. Na sapos yu bihainim tru, bai tit bilong yu i kiln na i waitpela na tit na maus bilong yu i no ken sting.

<p>Bilong strongim tit, yu mas dringim plantim susu, na kaikai ol samting i gat vitamin na gutpela marasin long en.</p>	<p>SUSU i gat kalsium na fosforus—em tupela samting i save strongim skin bilong tit. Na tu i gat vitamin A, B, C, na D.</p>	<p>OLKAIN SAYOR i gat vitamin A na C.</p>	<p>Sapos yu no lukautim gut tit bilong yu, bai ol i bagarap olsem:</p>	<p>GUTPELA TIT</p> <ol style="list-style-type: none"> 1. Skin 2. Bun 3. Rop 	<p>WARI</p> <p>Lukaut, nau hul i bin kamap inap long bun bilong tit. Nau yu save pilim liklik pen. Hariap. Go lukim dents.</p>
	<p>KIAU i gat kalsium, fosforus na vitamin A, B, na D.</p>	<p>OLKAIN PRUT i gat vitamin A na C.</p>		<p>PIS i gat fosforus na vitamin B.</p>	<p>LUKAUT</p> <p>Wanpela liklik hul i bin kamap long skin bilong tit na skin i stat long sting. Go hariap long dents (doka tit).</p>

Yu mas kaikai mit wantaim sayor bilong kisim vitamin A, B, na C.

Lukaut: planti switpela kaikai na loli i save bagarapim tit hariap.

Colgate gris bilong tit em i swit moa, na i mekim tit bilong yu i waitpela na i strong.



Tok save i kam long Colgate Palmolive bilong helpim helt bilong tit.

OL SPAI LONG JERIKO

(Namba 27: 19. Diuteronomi. Josua 2:1)

Josua i kalap nogut long harim God i bin makim em long kisim ples bilong Moses.

Josua, yu no ken pret. God yet i makim yu Em bai helpim yu olsem em i bin helpim mi.

Mi pre bai mi inap. Yu yet i mas tokim ol pipel.

Yes, orait. Na mi gat sampela arapela tok long givim long ol tu.



Ol pipel i bel nogut - na ol pret liklik - long harim bai Moses i no go wantaim ol long nupela kantri. Tasol ol i putim gut yau long ol samting em i tokim ol.

Inap 40 yia nau mi bin go pas long yupela olsem lida. Mi laik givim wanpela las tok long yupela: Yupela i mas laikim God moa moa yet.

Skulim ol pikinini bilong yupela long ol lo bilong God. Bihainim ol dispela lo, na God bai blesim yupela.



Used by permission of the David C. Cook Foundation. Copyright 1973, David C. Cook Publishing Co. All rights reserved.

Orait, nau long ai bilong ol Isrel Josua i niidaun

Josua, God bai stap wantaim yu. Yu mas sanap strong na bringim ol pipel i kam long spesel kantri...




Bihain long sampela de Moses i givim wanpela rola pepa long ol pris Em hia pepa i gat lo bilong God long en. Putim em insait long bokis kontrak wantaim tupela siet ston i gat 10pela lo long ol.



Moses i miting wantaim moa. Na ol pipel nau i bel nogut, ol i save em i laik tok gutbai long ol nau. Em i singim wanpela song na han bilong em i go antap na em i blesim ol

God, yu blesim ol pipel inap oltaim....



Nau Moses i tanim na i wokabaut i go



OL I BRUKIM WARA JODAN


(Josua 2:1 - 4:10)

Taim tupela spai i go insait long Jeriko, tupela i no go long hotel. Tupela i painim rum long haus bilong meri Rehap.

Mipela i bilong longwe ples. Inap mitupela i ken sip long haus bilong yu long dispela nait?

Soldia bilong king i wari long tupela man ya. Bai mi painimaut watpo tupela i bin kam....

I ken.



Mi harim man i wokabaut..hariap.. yupela i hait antap long ruf.

Tupela man i bin kam insait hia. Tupela i stap we?

Yes, tupela man i bin kam painim rum bilong slip. Tasol tupela i bin ranawe i go bipo ol man i pasim dua bilong siti. Sapos yu hariap, yu inap painim tupela yet.



Ol soldia i go pinis, tasol ol i bin larim wanpela man long was long dispela haus.

Bai mipela ranawe olsem wanem?

Mi save pinis bai God i helpim yupela Isrel long kisim dispela siti Jeriko. Sapos mi helpim yutupela nau, inap long mi no ken lus na famili bilong mi i ken stap gut taim yupela i kam bek?



Bihain liklik... Yutupela i save i gat wanpela man i bihainim yutupela?


Tru? Husat?



Tupela spai i promis bai Rehap na famili bilong em i orait.

Em i wokabaut i go apim Maunten Nibo na i lukluk i go long kantri Kenan - kantri God i bin promisim em... Em wanpela i stap. na i dai.

Insait long kem, Josua i pre bai God i helpim em. Na God i bekim tok: yu no ken pret; mi stap wantaim yu.



Yu ting mipela inap winim Jeriko?

Yesa. Bipo long 40 yia ol tumbuna i tanim bek bikos ol i pret. Nau yumi bilip strong long God na lida em yet i bin makim.

Long nait long arere bilong wara Yupela skaut inap painim taim nogut. Lukaut...na giasim gut ol samting.



Long neks de - insait long Jeriko

Ol Isrel i krai na i sori inap 30 de long Moses. Bihain Josua i putim wanpela kibung.

Ol pait mipela i mas mekim nau bai i no isi. Tasol ol taim mipela mas askim God long helpim mipela.

Ma mipela bai bihainim yu, olsem Moses bipo.

Bihain long 3-pela de bai mipela brukim wara Jodan. Bihain mipela i mas winim biktaun Jeriko. Pastaim yumi mas spai long en.



Ol banis i antap na draipela moa na strong tru.

Na ol soldia i holim gutpela samting bilong pait.

Em haus pasindia... yumi traim baim rum.

Dispela tupela man i no wantok. Bai mi ripotim tupela long gad...

Inap 3-pela de yutupela mas hait insait long ol ples maunten. Bihain yupela inap long brukim wara Jodan gen.

Tupela spai i harim tok bilong Rehap na i kamap ripot long Josua.

Dispela biktaun i gat tupela banis. Antap bilong tupela inap long 30 fit. Na tupela i strong moa.


Tasol ol pipel i bin harim stori long mipela na ol i pret...

Taim ami bilong mipela i kam bek, yu mas tarim dispela retpela rop i hangamap long windo bilong yu - bai ol man i ken save long haus bilong yu.

Gutpela... Nau mipela redi nau long brukim wara Jodan na kisim Jeriko.

Wara i brait na i ran hariap moa. Bai mipela mekim wanem?

God i helpim mipela bipo long brukim Ret Si. Em inap mekim gen.



Karim bokis kontrak i go insait long wara


Ol pris i mekim olsem, na wara Jodan i pas i stap

Yupela i sanap hia wantaim bokis kontrak inap olgeta manmeri i kamap long arasait...



Olsem long hap antap, wara Jodan i pas i stap na bikpela lain Isrel i wokabaut i go kamap long graun God i bin promis long givim long ol.





MALOLO

